



TEKS UCAPAN

YB HAJAH AIMAN ATHIRAH BINTI SABU

TIMBALAN MENTERI

PEMBANGUNAN WANITA, KELUARGA DAN MASYARAKAT

PROGRAM JERAYAWARA KASIH KPWKM

@ADVOKASI ANTIGANGGUAN SEKSUAL NEGERI PAHANG

THE ZENITH HOTEL, KUANTAN, PAHANG

26 OGOS 2023 (SABTU) / 11.00 PAGI

Bismillahir Rahmanir Rahim

Assalamualaikum Warahmatullahi Wabarakatuh,
Salam Sejahtera dan Salam Malaysia Madani.

(SALUTASI)

LAMPIRAN SALUTASI DISEDIAKAN

(A) **PENDAHULUAN**

1. Alhamdulillah, Segala Puji Bagi Allah SWT, Tuhan sekalian alam kerana dengan limpah kurnia-Nya dapat kita berkumpul pada pagi ini dalam **Program Jerayawara Kasih KPWKM @Advokasi Antigangguan Seksual Negeri Pahang.**
2. Pertama sekali, saya ingin menyampaikan setinggi-tinggi penghargaan dan ucapan terima kasih kepada semua Ketua-Ketua Jabatan Kerajaan Negeri Pahang, wakil-wakil Kerajaan Persekutuan, Badan-Badan Korporat, Persatuan Majikan Dan

Sekerja, Badan Bukan Kerajaan (NGO) serta rakyat Negeri Pahang yang turut hadir pada pagi ini.

3. Sesungguhnya, kehadiran tuan-tuan dan puan-puan pada pagi ini **menunjukkan solidariti, sokongan** serta **kebersamaan dalam menyokong agenda kesejahteraan masyarakat bagi mencapai persekitaran yang selamat dan kondusif untuk semua.**

LATAR BELAKANG

Puan-puan, tuan-tuan, hadirin yang saya kasihi sekalian.

4. Isu gangguan seksual bukanlah sesuatu yang baharu. Oleh itu, kita perlu sentiasa menambah baik undang-undang semasa agar sesuai dengan perubahan dan peredaran masa. Kini, gangguan seksual bukan sahaja berlaku secara fizikal tetapi juga secara dalam talian atau *online*.

5. Walaupun masalah ini bukan perkara yang mudah untuk ditangani, adalah sangat penting dan mustahak untuk kita menguar-uarkan dan memperbanyakkan kefahaman berkaitan **isu gangguan seksual**.

6. Salah satu cabaran dalam menangani gangguan seksual adalah apabila terdapat sesetengah pelaku mungkin menganggap tindakan mereka hanyalah sebagai jenaka yang tidak berbahaya atau disalah ertikan. Namun, **ingin saya tekankan di sini, seharusnya tiada ruang dan peluang**

diberikan untuk sebarang bentuk perlakuan, perbuatan atau perbuatan yang menyentuh tentang isu gangguan seksual ini sama ada secara terang-terangan atau jenaka.

7. Kesan kepada mangsa tidak terhad pada gangguan mental sahaja. Hal ini kerana perbuatan dan perlakuan ini mendorong kepada jenayah seksual yang lebih serius dan memberi kesan negatif terhadap mangsa termasuklah trauma dan ketakutan yang berpanjangan.

8. Menurut statistik yang dilaporkan oleh Polis Diraja Malaysia (PDRM), jumlah kes gangguan seksual yang dilaporkan meningkat dari **378 kes pada 2020 dan seterusnya meningkat kepada 506 kes pada 2021**. Walau bagaimanapun, terdapat **sedikit penurunan pada tahun 2022 iaitu kepada 477 kes**. Jumlah kes yang dilaporkan ini adalah melibatkan kedua-dua jantina iaitu lelaki dan wanita.

9. Majoriti mangsa ialah kaum wanita iaitu sebanyak **354 kes pada tahun 2020, 446 kes pada tahun 2021 dan 416 kes pada tahun 2022**. Statistik ini jelas menunjukkan bahawa setiap

tahun lebih **90 peratus** daripada kes gangguan seksual melibatkan mangsa dalam kalangan kaum wanita.

10. Bagi Negeri Pahang, pada tahun 2022, **terdapat 15 kes gangguan seksual di mana 13 kes atau 87 peratus adalah melibatkan gangguan seksual terhadap kaum wanita.**
11. Selain itu, kes gangguan seksual yang melibatkan kanak-kanak juga amat membimbangkan dan mencatatkan sebanyak **35 kes pada tahun 2022 di seluruh negara.** Bagi

Negeri Pahang pula, terdapat 1 kes gangguan seksual yang melibatkan kanak-kanak.

12. Statistik ini menunjukkan bahawa gangguan seksual boleh terjadi di mana – mana sahaja, dalam apa jua bentuk dan kepada mana-mana individu tanpa mengira jantina, usia, kaum ataupun agama termasuklah kepada **golongan yang tidak berdaya seperti kanak-kanak.**
13. Justeru, adalah menjadi tanggungjawab semua pihak sama ada ibu bapa, guru-guru, jiran tetangga serta seluruh lapisan

masyarakat untuk memainkan peranan melindungi mereka ini daripada dieksploitasi dan menjadi pemandiri gangguan seksual.

14. Ibu bapa juga harus lebih peka mendengar dan berani bertindak dalam menangani kes gangguan seksual terhadap kanak-kanak dan sewajarnya memberi pendedahan awal melalui pendidikan kepada anak-anak sejak kecil lagi. Pendedahan dan pendidikan secara berterusan dapat mendidik mereka agar dapat membezakan antara sentuhan

selamat dan sentuhan tidak selamat. Ibu bapa juga perlu sentiasa terbuka dalam mewujudkan persekitaran yang mana anak-anak bebas bersuara dan berkongsi pengalaman harian ketika berada diluar pengawasan.

15. Dengan cara ini, ibu bapa dapat mengesan jika berlaku sesuatu yang mencurigakan atau berlaku perubahan kepada perilaku anak-anak.
16. Sehubungan itu, Kementerian Pembangunan Wanita, Keluarga dan Masyarakat (KPWKM) telah menggubal **Akta**

Antigangguan Seksual 2022 [Akta 840], sebagai suatu Akta Khusus untuk menangani kesalahan gangguan seksual.

17. Akta ini diharap dapat membantu mangsa untuk tampil melaporkan kejadian gangguan seksual supaya tindakan dapat diambil dengan sewajarnya dan remedi dapat diberikan kepada mangsa dan juga bentuk sokongan psikososial kepada keluarga.

18. **Penguatkuasaan Akta** ini telah dilaksanakan **secara berperingkat mulai 28 Mac 2023** yang melibatkan takrifan gangguan seksual dan elemen kesedaran, pendidikan serta pemahaman mengenai gangguan seksual kepada masyarakat.

(B) **PELAKSANAAN PROGRAM JERAYAWARA KASIH KPWKM @ADVOKASI ANTIGANGGUAN SEKSUAL**

Puan-puan, tuan-tuan, hadirin yang saya kasihi sekalian.

19. Pelaksanaan **Program Jerayawara KASIH KPWKM@Advokasi Antigangguan Seksual** ini diharapkan agar dapat mencapai objektif seperti berikut: -

- (i) **Memberikan pendedahan** dan pengetahuan kepada masyarakat mengenai gangguan seksual;

- (ii) **Menyebarkan pemakaian garis panduan** dan notis antingangguan seksual kepada semua lapisan masyarakat;
- (iii) **Menyampaikan maklumat** berkenaan bantuan dan perkhidmatan psikososial yang disediakan oleh KPWKM terutama dalam menangani gangguan seksual; dan
- (iv) **Menjalinkan kolaborasi strategik** dengan semua pihak bagi meningkatkan pencegahan dan kesedaran gangguan seksual.

20. Program ini juga bertujuan untuk memberikan kesadaran, pendidikan mengenai gangguan seksual agar **budaya menormalisasikan gangguan seksual dapat dihapuskan**. Inisiatif yang boleh dilakukan termasuklah menyediakan platform latihan untuk pekerja sosial dan sukarelawan, serta **meningkatkan pengetahuan pekerja di tempat kerja tentang tindakan yang perlu diambil jika ada sebarang bentuk aduan berkaitan gangguan seksual**.
21. Di samping itu, pelaksanaan ini juga adalah **selaras dengan Akta Kerja 1955 (Pindaan) 2022 yang telah berkuatkuasa**

pada 1 Januari 2023 yang turut mewajibkan majikan untuk mempamerkan notis mengenai gangguan seksual di tempat kerja.

22. Justeru, KPWKM telah membangunkan **Notis Antigangguan Seksual** yang boleh dimuat turun melalui Kod QR dan laman web Jabatan Pembangunan Wanita (JPW) untuk dipaparkan di setiap organisasi termasuk premis awam dan swasta.

23. Selain itu, Program Jerayawara KASIH KPWKM @Advokasi Antigangguan Seksual juga bertujuan untuk menguar-uarkan penyampaian perkhidmatan yang disediakan oleh jabatan dan agensi di bawah Kementerian Pembangunan Wanita, Keluarga dan Masyarakat melalui pelbagai aktiviti dan reruai pameran yang disediakan.

24. Antara jabatan dan agensi di bawah Kementerian yang terlibat adalah Jabatan Pembangunan Wanita (JPW), Jabatan Kebajikan Masyarakat (JKM), Lembaga Penduduk dan Pembangunan Keluarga Negara (LPPKN), Institut Sosial

Malaysia (ISM), Lembaga Kaunseling Malaysia (LKM), dan Yayasan Kebajikan Negara (YKN).

25. Turut bersama dengan KPWKM pada hari ini adalah rakan strategik Kementerian seperti Hospital Tengku Ampuan Afzan (HTTA), *One Stop Crisis Centre* (OSCC), Jabatan Kesihatan Negeri Pahang, Klinik Al-Hijraa, Jabatan Bantuan Guaman, NGO Usahanita dan lain-lain lagi.

26. Selain itu, terdapat juga gerai jualan produk-produk daripada usahawan-usahawan wanita di bawah Jabatan

Pembangunan Wanita, Yayasan Kebajikan Negara dan Jabatan Kebajikan Masyarakat.

27. Di kesempatan ini, saya juga memohon kepada hadirin sekalian untuk berkongsi maklumat mengenai Advokasi Antigangguan Seksual kepada keluarga, sanak saudara serta rakan-rakan sebagai usaha untuk memberikan kefahaman kepada masyarakat di dalam komuniti kita.

(C) HARAPAN

Puan-puan, tuan-tuan, hadirin yang saya kasihi sekalian.

28. Saya berharap dengan kebersamaan **agensi Kerajaan, sektor korporat, Badan Bukan Kerajaan (NGO) serta seluruh masyarakat untuk bekerjasama agar** kes gangguan seksual akan dapat dibendung dan sekaligus **menyediakan persekitaran yang selamat kepada bukan sahaja wanita malahan lelaki termasuk juga kanak-kanak dan setiap lapisan masyarakat.**

29. Saya ingin berkongsi petikan **Surah at-Taubah, Ayat 71, Allah berfirman yang bermaksud, “Dan orang-orang mukmin lelaki dan perempuan, sebahagian mereka menjadi penolong kepada sebahagian yang lain. Mereka menyuruh membuat kebaikan dan melarang daripada kejahatan.”** Jadi, kita hendaklah saling menolong untuk melindungi golongan yang memerlukan seperti wanita dan kanak-kanak daripada terus menjadi mangsa keganasan.

30. Seperti yang kita sedia maklum, **25 Ogos 2023 adalah Hari Wanita Kebangsaan** dan saya ingin mengucapkan Selamat Menyambut Hari Wanita Kebangsaan kepada semua.
31. Pada hari ini juga, suka saya mengambil kesempatan untuk mengucapkan **Selamat Menyambut Hari Kebangsaan yang ke-66, dengan tema: Malaysia Madani: Tekad Perpaduan, Penuhi Harapan.** Perjalanan kita untuk mendapatkan kemerdekaan pada tahun 1957 membuktikan kejayaan Malaysia mencapai perpaduan dalam kepelbagaian (*unity in diversity*).

32. Semangat ini seharusnya kita sematkan bagi memastikan kita terus bersatu dalam memberikan komitmen untuk memupuk persekitaran yang selamat dan bebas dari keganasan seksual. **Ingatlah, adalah penting dalam kita meraikan sejarah Malaysia, kita juga harus jangan lupa untuk terus membentuk masa depannya yang lebih selamat dan sejahtera.**

33. Izinkan saya mengakhiri ucapan dengan serangkap pantun:

[PANTUN]

Pergi ke kedai membeli sarapan,

Berhenti sebentar melihat pelangi,

Tekad perpaduan penuh harapan,

Gangguan seksual mesti diperangi.

34. Akhir kalam, dengan lafaz “Bismillahir Rahmanir Rahim”, sukacita saya melancarkan **Program Jerayawara KASIH KPWKM @Advokasi Antigangguan Seksual Negeri Pahang.**

Sekian, Wabillahi taufiq walhidayah

Wassalamualaikum warahmatullahi Wabarakatuh.

YB HAJAH AIMAN ATHIRAH BINTI SABU

Timbalan Menteri Pembangunan Wanita, Keluarga dan Masyarakat

26 Ogos 2023